

弘玄和尚
法彙
年譜

李石菴敬題



岑學呂編

宏宏和尚
法彙
年譜

願以此功德

普及於一切

我等與眾生

皆共成佛道

歲次

一九九六年一月七日

乙亥年十一月十七日

阿彌陀佛聖誕良辰敬印

「

虛雲和尚

法彙

年譜

」

倡印者：香港寶林禪寺

結緣
贈閱

虛雲和尚法像



雲公像讚

倔彊此老 天魔嚇倒 露乃金剛 殺人如草
空中樓閣 沒頂頭腦 多子塔前 戈領糞掃
法華會上 分座多寶 無相而相 善頌善禱
先喫痛棒 再申懷抱 不動舌頭 許汝道道

弟子明一觀本敬題



寬賢老居士慧鑒：年譜一冊今日始得寓目，閑河多

阻，感嘆奚如！憶壬辰歲春，雲門事變時，雲重傷重

病，目不見耳不聞，奄奄一息，九死餘生，偃卧床褥，弟子

証圓等侍奉病榻，夙夜詢問，予生平事蹟，蓋恐

雲有意外及禍患之重來也。雲神情不甯，語音乖澀，

隨說隨錄，不成片段，予亦未曾過目，祇証圓等將稿寄

交居士考訂，承港中善信過愛，遽爾印行，且再版

雲居茅蓬用箋

矣。時閱四年，雲始得見其中不無誤記之處，今令侍

者畧為簽出請

居士於刊刻三版時更正之

雲

目瞶耳聾不能細閱百病

日增待盡而已人生如夢一切皆幻空中飛鳥有何踪跡可

尋況學道人耶留此數行又有何益若居士以為

佛法不離世法隨順可爾此候

法樂

虛雲



丙申八月十二日

原序

青龍在壬辰之歲。雲門劫後。山陬法物。蕩然無存。吾師虛雲和尚。傷法道之陵夷。慮慧命之斷絕。使其徒向曩日駐錫之東南諸巨刹。網羅散帙。而平生殫力所著之「楞嚴經玄要」。「法華經略疏」。「遺教經註釋」。「圓覺經玄義」。「心經解」。竟不可得。僅繕寫法語詩文少分回。師歎曰。定業也。吾今不復隱秘矣。徇證圓等懇求。乃集諸弟子口述一百餘年所憶及之事蹟。錄爲年譜。並將蒐錄所得之法語詩文序跋等。命學呂編輯。爰集同人。分任讎勘。考訂附註。撰次爲十卷。另年譜上下二卷。筆始於春初。簡撤於冬暮。名曰虛雲和尚法彙初編。書成。乃爲之序曰。學呂以博地凡夫。瞻仰十地菩薩。但覺其不可思議。非游夏所能贊一詞也。何敢序。以師命故。又何敢違。每於冥心編輯之際。味吾師不可思議之思。隨見隨拈。因月有指。枝中覓本。委上求原。聊此引伸。就正有道。夫諸佛以大事因緣。出現於世。諸祖以續佛慧命。乘願再來。豈惟自了。有大悲大願存焉。悲大故憂之也深。願大故任之也重。吾師於五十六歲以前是自度。五十六歲以後是度人。竊窺其行履。志大氣剛。心堅行苦。故能度生衆而收效弘。歷盡折磨。九死而不死。坐閱世變。有生而無生。至其手建大小梵剎數十。

歸依門下弟子中外百數十萬人。此舉世所共知者也。而獨於吾師之重振綱宗。續佛慧命。有爲世所不盡知者。溯自達摩西來。至六祖而一花五葉。臨濟開玄要之宗。洞山立君臣之義。爲仰發體用之論。雲門示三關之捷。法眼呈六相之分。拈花妙義。大布東方。及後則曹洞專主少林。爲仰則圓相漸隱。雲門於韓大伯後。難見其人。法眼盛於永明。而入高麗。獨臨濟尙存香火耳。元明以降。禪門宗匠。自中峯。楚石。以遞紫柏。憨山。天童。玉琳。屈指可數。獅絃其絕響矣。百餘年後。吾師出世。於鼓山傳法曹洞。兼嗣宗臨濟。中興雲門。扶持法眼。延續爲仰。與滅繼絕。慧日同光。以一身而參與五宗法脈。舍西竺龍樹外。其誰耶。學呂特爲拈出。以告後之研求宗乘者。諒爲吾師之所許夫。序書於癸巳元旦。師年一百一十四歲矣。三災過後。佛日重輝。願留寶掌千年。常作人天眼目。慈雲普蔭。法乳同沾。則法彙由初編二編以至若干編。豈止宗鏡百卷已哉。此衆生所共禱者也。學呂淺陋。毫彌昏昧。傳燈續錄。有賴後賢。是爲序。

鼓山門下弟子順德岑學呂寬賢恭序

佛歷二千九百八十年歲次第七十八癸巳

越六年己亥秋。師示寂於雲居山真如寺。事前一月。以近年蒐集之佚稿及弟子錄存之

辛丑仲秋學呂再識

目錄

虛雲和尚像

像贊

原序

法語

開示

書問

文記類
(附規約)

詩歌

虛雲和尚傳

年譜

虛雲和尚
法彙年譜

目錄

一一一七

一一八一七八

一七九—二一〇

二二一三六〇

三六一—四四二

一四二七

虛雲和尚法彙

鼓山門下弟子順德岑學呂寬賢編輯

法語

元旦上堂

玉戶不出。尊客天然。纔涉功勳。墮坑落塹。與其中途受用。何如金殿垂簾。直饒入林不動草。入水不動波。也是懸崖上走馬。只如君臣道合。主賓回互。敲唱雙行。水乳合同。又作麼生。舉拂云。九天闔闔開宮殿。萬國衣冠拜冕旒。

元宵

山中正月十五。不是邨歌社舞。都盧本分禪和。不打尋常笛鼓。剔起無相燈光。照破人人鼻祖。且道燈未明時。光在什麼處。舉拂子云。明暗兩頭俱脫落。一刹那際現全身。

立春上堂

春山疊亂青。春水漾虛碧。寥寥天地間。獨立望何極。大小雪竇見解如此。更買草鞋行脚去。

此間亦有一頌。春山疊亂青。春水漾虛碧。春花爛漫開。春鳥鳴啾啾。且道雪竇是。此間是。試定當看。

四月八日新戒請上堂

今日四月八。皇宮生悉達。九龍噴金軀。萬古香湯潑。僧問。如何是誕生王子。師云。苦瓜連根苦。進云。如何是朝生王子。師云。百城煙水渺無垠。進云。如何是未生王子。師云。窗前勤苦讀。馬上錦衣回。進云。如何是化生王子。師云。橫按鎧鎗全正令。進云。如何是內生王子。師云。穩坐金殿裏。笑看雲捲舒。問。指天指地。事已張揚。師云。得人一牛。還人一馬。進云。戒元飯僧。未審和尚還受他供養也無。師云。老僧供養他有份。進云。諸供養中。法供養最。又作麼生。師云。難消滴水。進云。怎麼則財法二施。等無差別也。師云。雨過竹風清。雲開山頂露。僧出云。某甲不問話。請師不答話。師云。早是多事了也。僧禮三拜歸位。師云。作家作家。僧掩耳。師云。適來患啞。今又患聾。僧無語。師云。果然多事。乃云。周昭甲寅四月八。淨飯王宮生悉達。纔出胎來。便捏怪。指天指地。阿喇喇。攪亂大千世界人。盡向餠餅裏討汁。更有雲門跛脚師。頓教一棒要打殺。把髻投衙可憐生。大似普州人送賊。雖然。一塵不立。野老安恬。是則固是。祇如門庭施設。國家興盛。又且如何。謝公財施兼法施。選得戒元勝狀元。

結夏

禁足安居。乃如來之儀軌。識心達本。是釋子之行門。道在人行。功由日進。茲者四月十五。適當我佛結夏安居之辰。雲集僧衆。登臨寶殿。諷演祕章。結起期制。自今以後。發十願。起三心。開明智性。報四恩。拔七趣。消滅障緣。受持佛號。存想聖容。不得冒熱遊行。傷害生命。稟七支之戒。皎如冰霜。持三律之儀。淨無瑕穢。定水澄清。慧日朗照。內契真源。外敷梵行。長般若之靈苗。成菩提之妙果。由此法門隆盛。海衆安和。天龍擁護。人物欽崇。

端節上堂

五月五日午時刻。百草煎膏除瘡結。雄黃白酒徧處灑。毒蟲穢氣皆消滅。世人如是慶端陽。衲僧將甚應時節。聊以拄杖弔中堂。超勝判符插門楔。諸仁者。且道拄杖子甚麼處超過判符。若道超不過。何以如此說。會麼。若道不會。請拄杖子自己造報。任他鑼鼓喧天。龍船飛渡。也是本地風光。靈明獨露。不動道場。憑你艾線榴紅。角黍斗大。無非祖師西來意。若也會得。任運度日。隨緣行化。如或未然。肚飢三碗粥。渴來一杯茶。——請

七月十五解制

九旬禁足。三月安居。聖制告圓。衲僧分上事作麼生看。靈山垂運慈悲。目連神通救母。幸得

諸佛歡欣。赦拔冥中罪苦。且道千古聞名。如何取則。僧問。罪性本空。赦個甚麼。云。爲有這個在。進云。怎麼則有罪也。云。有。進云。還許懺悔也無。打云。冤家解脫。問。從天降下。卽不問。就地還鄉。事若何。云。寒巖枯木逢春秀。進云。正怎麼時。如何。云。帶雪松枝色更新。問。如何是人中境。云。鐵蛇橫古路。問。如何是境中人。云。踏着兩頭忙。進云。人境俱忘。時作麼生。云。腳根下好與三十棒。乃云。德山棒。臨濟喝。雲門餅。雪峯杓。禾山打鼓。木人奏樂。人人有分。個個摸索。頭角崢嶸。天清地濁。眼光電掣。口傾山嶽。正怎麼時。如何注腳。喝一喝云。斬卻南泉死貓頭。救得趙州狗子活。

師誕日大衆設齋請上堂

問。鐘鼓交參。人天普集。師登寶座。說何法要。師云。一朵紅雲擎寶蓋。進云。有何利益。師云。半空鐘韻落天花。進云。怎麼則佛祖歸宗。人天瞻仰。師云。聾者不聞其音聲。盲者不覩其文彩。問。纔登戒品。便踏佛階。是如何。師云。法海汪洋。何處躡足。進云。乞師引導。師云。千鈞之弩。不爲鼯鼠發機。進云。弟子退身有分。師云。向你道沒處躡足。問。輕煙籠皎月。薄霧鎖寒巖。如何是禪定。師云。銀盃盛雪。明月藏鷺。進云。撥開雲外路。翻去月明前。如何是般若。師云。茅戶挂珠簾。龍樓鋪草座。進云。莫行心行處。不挂本來衣。如何是解脫。師云。誰有單于調。換取假銀

城間得之於心。伊蘭作栴檀之樹。失之於旨。甘露迺疾藜之園。如何是戒。師云。信步入荒草。忘卻長安路。進云。如何是定。師云。百花叢裏過。一點不沾身。進云。如何是慧。師云。信受奉行。僧禮退。師乃云。此一段大事。汝若信得及。解得徹。纔登戒品。便踏佛階。戒定慧信受奉行。便得銀盃盛雪。明月藏鷺。茅戶挂珠簾。龍樓鋪草座。佛祖歸宗。人天瞻仰。汝若信不及。解不徹。法海汪洋。何處躡足。禪定般若解脫。大似輕烟籠皎月。薄霧鎖寒巖。單于調換取假銀城。聾者不聞其音聲。盲者不覩其文彩。只得退身有分。雖然如是。因齋慶贊一句。作恁麼道——一朵紅雲擎寶蓋。半空鐘韻落天花。

中秋節上堂

中秋雲散月空懸。海衆同參問祖禪。赤脚頭陀無個事。橫拈白棒打瘋癲。問。牛頭未見四祖時如何。云。世情偏向有錢家。進云。見後如何。云。仁義盡從貧處斷。進云。卽今響答。莫妄想。問。參禪念佛。貴脫生死。生死到來。如何迴避。答。不用念佛參禪。再進云。不用念佛參禪。如何抵敵。打云。扶籬摸壁漢。乃云。今日中秋節。一輪光皎潔。自從威音來。古今無欠缺——會麼。

冬至小參

魯史書五雲。漢宮添一線。六陰剝落盡。一陽喜來生。天地否變作地天泰。小人道消。君子道

長。諸佛子。未得個入處。須覓個入處。已得個入處。亦須陸沈衆中。不露圭角。過了五九四十五。春雷一震——轟隆——躍過龍門。自然驚天動地去也。

除夕法語

臘月三十日到來也。諸仁者。脚跟下事作麼生。汝等須知。人人本具。個個圓成。所以道。行住坐臥。不離這個。若或不識。當面錯過。三世諸佛。也是這個。歷代祖師。亦是這個。天下老和尚。只是這個。乃至鱗甲羽毛草木昆蟲。無不承這個恩力。諸仁者。還會得這個麼。若會得眉毛依舊。其或未然。年來更有新條在。惱亂春風卒未休。

光緒二十四年戊戌在寧波崇壽寺

七塔寺佛誕日請上堂

陞座。拈香畢。歛衣就座。上首白椎云。法筵龍象衆。當觀第一義。執拂子云。年年有個四月八。人人盡道生悉達。惹得雲門不肖兒。白棒無情要打殺。且道釋迦老子過在什麼處。雲門意作麼生。衆中還有檢點分明者麼。僧問。世尊畫蛇添足。雲門雪上加霜。未審和尚如何。師便打。進云。正是雪上加霜。師云。擔枷過狀。問。佛未出世時如何。師云。一鎚撩天。進云。出世時如何。師云。四楞着地。僧擬議。師打云。天上天下。惟吾獨尊。隨云。覲面風雷白浪翻。滿盤璀璨寶珍珠。當